

Evening Dogri (NSD)

04-12-2025

खबरां

1. रूस दे राष्ट्रपति व्लादिमीर पुति अज्ज भारत दे सरकारी दौरे पर पुज्जी गे न। इस दरान ओहू 23में भारत-रूस सालाना शिखर सम्मेलन च हिस्सा लैडन।
2. रक्षा मंत्री राजनाथ सिंह होरें अज्ज आखेआ ऐ जे आलमी सतह उप्पर यक्कोतक्की दे बावजूद भारत ते रूस दे रिश्ते लगातार तगड़े बना करदे न। उ'नें आखेआ ऐ जे रूस, भारत दा सामरिक भ्याल ऐ।
3. उद्योग ते बपार मंत्री पीयूष गोयल होरें आखेआ ऐ जे भारत ते रूस दी सांझ-भ्याली समें दी हर कसौटी पर खरी उतरी दी ऐ।
4. राज्यसभा दे चेयरमैन सी.पी राधाकृष्णन होरें साफ कीता ऐ जे नियम 267 दे तैह्त सदन च चर्चा छड़ी दिनै दे एजेंडे च सूचीबद्ध मामलें पर गै होई सकदी ऐ।
5. राज्यसभा ने केन्द्री आबकारी (तरमीमी) बिल 2025 गी सोच-बचार आस्तै लेई लैता ऐ।

<><><><><><>

Putin India Visit

रूस दे राष्ट्रपति व्लादिमीर पुतिन 23मीं भारत-रूस सालाना शिखर बैठक आस्तै भारत दी सरकारी यात्रा पर नमी दिल्ली पुज्जी गए न। 2-दिन दी इस यात्रा दौरान राष्ट्रपति पुतिन नमीं दिल्ली च प्रधानमंत्री नरेन्द्र मोदी हुंदे कन्नै गल्लबात करगंन। दवै नेता आपसी हितें दे क्षेत्रीय ते वैश्विक मुद्दें पर विचार-विमर्श करगंन। बपार- अर्थ-बवस्था- सेहत सेवा- शिक्षा- संस्कृति ते मीडिया दे क्षेत्रें सनें केई सारे समझौतें पर दस्तख्त होने दी मेद ऐ।

<><><><><><>

Rajnath-Russian DM

रक्षा मंत्री राजनाथ सिंह होंरें अज्ज आखेआ ऐ जे आलमी सतह उप्पर यक्कोतक्की दे बावजूद भारत ते रूस दे रिश्ते लगातार तगड़े बना करदे ना। उ'नें आखेआ ऐ जे दौनें देशें दे रिश्ते, समें दी कसौटी पर खरे उतरे दे न ते दौनें मुख इक-दुए दे सामरिक भ्याल ना। नमीं दिल्ली च रूस दे रक्षा मंत्री आंद्रे बेलोसोव हुं'दे कननै फौजी समर्थ बारै भारत ते रूस दी 22मीं अंतर सरकारी कमिशन दी बैठक दी सांझे तौर उप्पर प्रधानता करदे होई राजनाथ सिंह होंरें एह गल्ल आखी। उ'नें गलाया जे ब'रे 2000 च भारत ते रूस बश्कार सामरिक सांझ-भ्याली आहले घोषणा पत्र पर दस्तख्त दे समें थमां गै दौनें मुखें बश्कार दपक्खी रक्षा सैह्योग च लगातार बाद्दा-विस्तार दिक्खने गी लब्बा ऐ।



Indo-Russia Relation

उद्योग ते बपार मंत्री पीयूष गोयल होंरें अज्ज आखेआ ऐ जे भारत-रूस सरबंधें गी हर दौर च मती तरजीह ते प्रतिश्ठा दे रूपै च दिक्खेआ गेआ। नमीं दिल्ली च भारत-रूस बपार फोरम दे इक कार्यक्रम गी संबोधत करदे होई गोयल होंरें आखेआ जे कई दाहकें थमां भारत-रूस सरबंध दुनिया भरै च फैली दिएं अनिश्चितताएं ते कठन कोला कठन परिस्थितियें या हालात च बी इकजुटता दी इक्क मिसाल दे रूपै च मजबूत बने दे रेय ना। उनें आखेआ जे भारत पूरी दुनिया लेई इक भरोसेमंद, जांचे-परखे दा ते खरा भ्याल ऐ, जेडा सदा सकारात्मकता कन्नै अगड़े बधने च यकीन रखदा ऐ। बपार च विस्तार करने लेई कम्म करदा ऐ ते आर्थिक भ्याली दी बरोस लेई साजगार माहौल तैयार करने दी सदा कोशिश करदा ऐ। गोयल होंरें आखेआ जे पूरी दुनिया च बनी दी अनिश्चितता दे बावजूद भारती अर्थ बस्था अपनी क्षमता कन्नै पूरी चाल्ली स्थिर बनी दी ऐ ते कई कुल संसारी चुनौतिएं दे बावजूद दुनिया दिएं 5 बड्डियें अर्थ बवस्थाएं च शामिल ऐ।



Russian Def. Minister

रक्षा राज्यमंत्री संजय सेठ होंरें अज्ज नमीं दिल्ली च पालम वायु सेना स्टेशन पर रूस दे रक्षा मंत्री आंद्रे बेलोसोव हुं'दा सुआगत कीता। रूस दे रक्षा मंत्री हुं'दे सरकार दौरे दे दरान उनें रक्षा मंत्री राजनाथ सिंह हुं'दे कन्नै नमीं दिल्ली च मलाटी करडन। मंत्रालय मूजब, बेलोसोव होर फौजी समर्थ बारै भारत दे रूस दे 22में अंतर-सरकारी आयोग दी सांझे तौर उप्पर अध्यक्षता बी कीती।

DRI-Foundation Day

केंद्रीय वित्त राज्य मंत्री पंकज चौधरी होरें अज्ज सरकार दी वचनबद्धता गी फही दोहराया ते आखेआ ऐ जे इस गल्लै गी जकीनी बनाया जा'रदा ऐ जे ईमानदार करदाता पूरे सम्मान दे कन्नै कारोबार करी सकन ते भारत दी ज़मीन, जलमार्ग यां हवाई रस्तें दा इस्तेमाल गैर-कानूनी कारोबार आस्तै नामुमकिन बनाया जा करदा ऐ। उ'नें एहू गल्ल नमीं दिल्ली च डायरेक्टरेट ऑफ़ रेवेन्यू इंटेलिजेंस यानि डीआरआई दे 68में स्थापना दिवस समारोह दे उद्घाटन दे मौके पर आखी। मंत्री होरें अधिकारियें गी भारत दे बन्ने आहले सुरक्षा ढांचे गी मज़बूत करने लेई टेक्नोलॉजी, जोखिम प्रबंधन उपकरणें ते वैश्विक सांझ-भ्याली दा लाहू ठोआंदे रौहने लेई प्रोत्साहित कीता। उ'नें इस गल्लै पर ज़ोर दित्ता जे तस्करी दे खलाफ़ डीआरआई दी लगातार कार्रवाई, गैर-कानूनी फंड गी रोका करदी ऐ, जेहदा इस्तेमाल देश-बरोधी समूह करी सकदे ना। इस मौके पर डीआरआई ने पिच्छले माली ब'रे दे दरान अपना सालाना फ्लैगशिप पब्लिकेशन, स्मगलिंग इन इंडिया रिपोर्ट बी जारी कीता, जेहदे च गैर-कानूनी कारोबार, बड्डी उपलब्धिएं, उभरदी चुनौतियें ते नीतिएं पर लोऽ पाई गेदी ऐ।



RS Rule Discussion

राज्यसभा दे चेयरमैन सी.पी राधाकृष्णन होरें साफ कीता ऐ जे नियम 267 दे तैह्त सदन च चर्चा छड्डी दिनै दे एजेंडे च सूचीबद्ध मामलें पर गै होई सकदी ऐ। उ'नें आखेआ ऐ जे सूचीबद्ध मामलें दे बगैर कुसै बी मुद्दे पर कोई बी नोटिस अमान्य ऐ। चेयरमैन होरें एहू फैसला शून्य कॉल दे दरान बरोधी धड्डे दे सांसदें आसेआ नियम 267 दे तैह्त दित्ते गेदे नोटिस गी दिक्खदे होई दित्ता। राधाकृष्णन होरें आखेआ जे नियम 267 दे तैह्त दित्ते गेदे नोटिस तकरीबन रोजमर्रा दे सूचिबद्ध कम्मकाज गी मुअत्तल करने ते सदस्यें आसेआ चुने गेदे मुद्दें पर चर्चा दी मंग करने लेई जमा कीते जा'रदे ना। उ'नें ज़ोर देइयै आखेआ जे नियम 267 दा एहू मकसद नेई ऐ। उ'नें इस गल्लै पर ज़ोर दित्ता जे राज्यसभा च नियम 267 दे मुकाबले च लोकसभा च स्थगन प्रस्ताव कन्नै नेई कीता जाई सकदा, जेहदी इजाज़त संविधान दी दफा 75(3) दे तैह्त दित्ती गेदी ऐ। उ'नें इस गल्लै पर बी जोर दित्ता जे नियम 267 दा मजूदा रूप इक कमेटी आसेआ कीते गेदे बदलावें थमां सामने आया ऐ, जिसी ब'रे 2000 च सदन च अपनाया गेआ हा। कमिटी ने दिक्खेआ जे इस नियम दा इस्तेमाल ओकडे मामलें पर चर्चा लेई कीता जा'रदा हा जेहडी सूचिबद्ध नेई न जां अजे तगर स्वीकार नेई कीते गे न, ते इसकरियै उ'नें इसी छड्डा सूचिबद्ध कम्मै कन्नै जुडे दे विशें तगर गै सीमित रक्खने दी सलाह

दित्ती। नियमें दा हवाला दिंदे होई, राज्यसभा चेरमैन होरें द'उं सदस्यें दे बक्ख-बक्ख मुहें पर दित्ते गेदे नोटिस गी एहू आखदे होई खारज करी दित्ता जे ओहू तय नियमें दे मताबक नेई हैन।



National Security Cess Bill

लोकसभा च अज्ज गुटखे दे सेवन कन्नै सोआस्थ गी होने आहले दुष्प्रभावे पर चैंता प्रगट करदे होई सदस्यें सरकार थमां एहूदे उपभोग गी रोकने दे उपाऽ करने दी मंग कीती ऐ। वित्त मंत्री निर्मला सीतारमण होरें सोआस्थ सुरक्षा थमां राष्ट्री सुरक्षा विधेयक, 2025 पेश करदे होई आखेआ जे पान मसाला ते गुटखे पर उपकर लाने कन्नै एहू महंगे होई जाडन ते इंके सेवन च किश कमी औग। एहूदे नै लोकें गी एहूदे कन्नै होने आहले नुकसान थमां बचाया जाई सकग। उनें आखेआ जे एहूदे थमां हासल होने आहला राजस्व गी योजनाएं दे जरिए राज्यें गी बी दित्ता जाहग।



Labour Codes

पिच्छले म्हीने दी 21 तरीक गी केन्द्र सरकार आसेआ लागू कीती गेदिआं नमीं श्रम संहितां पूरे भारत च मजूरें दी रोज़ी-रूट्टी गी स्थिरता देने दा कम्म करा'रदिआं न। साढे संवाददाता ने दी रिपोर्ट मूजब एहू नमें सुधार पूरे देसै च निर्माण खेत्तर दे मजूरें-कम्मगारें गी सिद्दा लाहू पुजा करदे न। नमें श्रम सुधारें दे कन्नै, सरकार ने देशै दे सबनें खेत्तरें च श्रमिकें सरबंधी खेत्तर गी मज्जबूत कीता ऐ। नमें सुधारें दे तैहत सरकारै निर्देश दित्ता ऐ जे कोई बी संगठन, कुसै बी मलाजम गी घट्टोघट्ट उजरत थमां घट्ट अदायगी नेई करग। इ'नें सुधारें च इब्बी प्रावधान ऐ जे कम्मकाज आहले सामान्य समें थमां मते कीते गेदे कुसै बी कम्मै लेई नियमित उजरत दी दर थमां घट्टोघट्ट दूना मुआवज़ा दित्ता जा। कन्नै गै, इ'नें संहिताएं संगठित खेत्तर दे कम्मगारें लेई कल्याण योजनाएं, जि'आं लाइफ़ डिसेबिलिटी कवर, सेहत ते मातृत्व सरबंधी लाहू ते बुढापे दी सुरक्षा वगैरह दा हक़ पक्का कीता ऐ। एहूदे अलावा, इ'नें नमीं नीतिएं दे लागू होने कन्नै, जेगर घर थमां कम्मकाज आहली थाहै बक्खी औंदे जां जंदे जां ड्यूटी करियै परतोंदे बेल्ले कोई हादसा होई जंदा ऐ, तां ओहू बी हुन कवर होंदा ऐ। नमें सुधारें कन्नै हुन तन्खाह दी हिफाजत, कम्मकाज आहली थाहै पर सुरक्षा ते समाजी सुरक्षा बी जकीन बना'रदी ऐ।



Navy Day

नौसेना दिवस अज्ज पूरे देश च मनाया जा'रदा ऐ। 4 दिसंबर गी हर ब'रे नौसेना दिवस भारती नौसेना दी भूमिका ते उपलब्धिएं गी उजागर करदे होई मनाया जंदा ऐ। 1971 च इस्सै दिन आप्रेशन ट्राइडेंट दरान भारती नौसेना नै 4 पाकिस्तानी समुंद्री बेडे तबाह करी दित्ते हे जिंदे च पी.एन.एस खैबर बी शामिल हा। उपराज्यपाल मनोज सिन्हा होरें नौसेना दिवस दी सभनें गी बधाई दित्ती ऐ। इक सोशल मीडिया पोस्ट च उपराज्यपाल होरें सारे कर्मिं ऐ ते उन्दे परिवारें गी मुबारकबाद दित्ती ऐ। देश दी समुंद्री सीमा दी हिफाजत, सुरक्षा पक्की ते मनुक्ख मिशनें च योगदान दे रूप च नौसेना दी सेवा काबिले तरीफ ऐ। उंदी हिम्मत, पेशेवर रूख ते निस्वार्थ सेवाएं गी सलाम ऐ।



Op Sagar Bandhu

आप्रेशन सागर बंधू दे तैहत भारत नै श्रीलंका च चक्रवात प्रभावत लोकें दी सहायता लेई बड़ी मती गिनतरी च राहत ते सहायता समेयान पुजाया ऐ। वायसेना दे ज्हाजै राएं उत्थे दूर-दरेडे ते प्रभावत इलाकें जित्थे सिडक सम्पर्क त्रुट्टी गेदा ऐ- लेई इक बना- बनाया बैल्ले ब्रिज भेजया ऐ- जिसी तुरत सिडकै दे नुक्सान पुज्जे दे हिस्से पर लाइयै गड्डियें ते लोकें दी आओ-जाई ब्हाल कीती जाई सकदी ऐ। इस पुल दी मदद कन्नै प्रभावत लोकें तगर दोआइयां- पानी- खाने-पीने दा समेयान- कम्बल- कपडे- टैंट ते रोजमर्रा दे इस्तेमाल आहलियां होर दुइयां चीजां पुजाने च बी सखाल होग। बैल्ले पुल दी मदद कन्नै राहत ते बचा कर्मियें गी बी प्रभावत इलाके तोड़ी पुज्जने च सखाल होग। श्रीलंका च चक्रवाती तूफान दित्वाह नै बड़ी मती तबाही मचाई ऐ- जेहदे कारण कोई 4 सौ लोकें दी मौत होई चुकी दी ऐ ते लक्खां बहे बेघर होई गेदे न। भारत उप्परोतली राहत ते मनुक्खी सहायता अपने इस गोआंडी गी पुजा करदा ऐ। भारतीय ब्हाई फौज दी सी-17 ट्रांसपोर्ट विमान मॉडयूलर फील्ड अस्पताल- 70 कोला मते डाक्टरें ते नीम डाक्टरी अमला ते गड्डियां लेइयै कोलम्बो पुज्जी गेदा ऐ। विदेश मंत्रालय नै दस्सेया ऐ जे तूफान प्रभावत श्रीलंका दी मदद लेई भारत नै 28 नवम्बर थमां गै आप्रेशन सागर बंधू शुरु कीते दा ऐ।



Vaccines-Afghanistan

भारत सरकारै अफगानिस्तान च इन्फ्लूएंज़ा ते मेनिंगीटिज़ बमारिएं दी रोकथाम लेई लाज़मी सेहत दिक्खभाल आहली मदाद उपलब्ध करोआई ऐ। बदेश मंत्रालय दे प्रवक्ता रणधीर जयसवाल होरें अज्ज दससेआ जे भारत ने काबुल गी 63 ज्हार शा मती वैक्सीन देई दिती ऐ। सोशल मीडिया पर इक पोस्ट च श्री जैयसवाल होरें आखेआ ऐ जे भारत ने इस गैहू दे राहें, अफगानिस्तान च सार्वजनिक सेहत लेई अपनी मदाद दी वचनबद्धता गी फही पक्का कीता ऐ। एहदे शा पैहले पिच्छले म्हीने दी 28 तरीक गी केन्द्र सरकारै अफगानिस्तान गी 73 टन जीवन रक्षक दवाइयां, वैक्सीन ते होर दुआ समेयान बी उपलब्ध करोआया हा।



Central Excise (Amendment bill)

राज्यसभा ने केन्द्री एक्साइज (संशोधन) बिल, 2025 गी बचार ते वापसी आस्तै लेई लैता ऐ। प्रस्तावित कनून उा मकसद केन्द्री आबकारी कानून, 1944 च बदलाव करना ऐ, खास तौर पर सिगरेट, सिगार, हुक्का, तंबाकू, ज़र्दा ते खशबूदार तंबाकू ज्नेहू तंबाकू उत्पादें पर एक्साइज ड्यूटी ते सेस गी बधाना ऐ। एह बदलाव सरकार गी तंबाकू ते तंबाकू कन्नै बने दे उत्पादें पर केन्द्री एक्साइज ड्यूटी दी दर बधाने लेई माली अख्तियार देने लेई ज़रूरी न, तांजे सेस खत्म होने दे बाद टैक्स दे असर गी बचाया जाई सकै। वित्त राज्य मंत्री पंकज चौधरी होरें राज्यसभा च एह बिल पेश कीता। लोकसभा पैहले गै एह बिल पास करी चुकी दी ऐ। इस बिल दा मकसद बगैर बने दे तंबाकू, बने दे तंबाकू, तंबाकू उत्पादें ते तंबाकू दे वैकल्पिक उत्पादें पर केन्द्री एक्साइज ड्यूटी बधाना ऐ। जिसलै के केन्द्री आबकारी कानून, 1944 च हर इक हज़ार सिगरेट पर 200 रुपें शा 735 रुपें तकरी दी एक्साइज ड्यूटी लगदी ऐ, बिल दे तैहत बधी दी ड्यूटी हर इक हज़ार सिगरेट पर 2,700 रुपें शा 11,000 रुपें दे बश्कार ऐ। बिल च बने दे तंबाकू उत्पादें पर मती एक्साइज ड्यूटी लाने दा बी प्रावधान ऐ। मिसाल दे तौर उप्पर, चापने आहले तंबाकू पर ड्यूटी 25 फीसद शा बधियै 100 फीसद होई जाहगा। हुक्के पर ड्यूटी 25 फीसद शा बधियै 40 फीसद होई जाहगा। पाइप ते सिगरेट दे स्मोकिंग मिक्सचर पर ड्यूटी 60 फीसद शा बधाइयै 325 फीसद करने दा प्रस्ताव ऐ। इस बिल दा मकसद लोके गी तंबाकू दे माडे असर थमां बचाना ते उ'नेंगी इसी खाने थमां रोकना ऐ।



